

CLUB DEPORTIVO PADURA-REN ESTATUTUAK

I. KAPITULUA ARAU OROKORRAK

1. ARTIKULUA.- Club Deportivo Padura irabazi asmorik gabeko elkarte bat da, iraupen mugagabea duena, berezko nortasun juridikoaz eta bere helburuak betetzeko jarduteko gaitasunaz hornitua. Elkarte honen helburu nagusia kirola, eta bereziki futbola, praktikatu eta sustatzea da.

Klubak ahalmen-urritasuna duten pertsonen kirola sustatuko du, unean-unean dagoen eskakizunaren arabera eta eskura dituen giza baliabideak eta baliabide materialak kontuan hartuta. Halaber sustatuko du emakumezkoen kirola, kirol-motak emakumeengana zabaltzeko lana bultzatuz.

Horrek ez du esan nahi, ordea, klubak bere kabuz edo beste entitate batzuen bitartez ezingo duenik jarduera ekonomikorik gauzatu, baldin eta klubaren helburuekin loturaren bat badute edo helburu horien zerbitzura badaude.

2. ARTIKULUA.- 1920an fundatu zen Club Deportivo Paduraren eraketa, inskripzioa, aldaketa, desegitea, antolaketa eta funtzionamendua honako lege-xedapen hauen mende egongo dira: Euskadiko Kirolaren ekainaren 11ko 14/1998 Legea, Kirol klub eta kirol elkarteei buruzko ekainaren 22ko 163/2010 Dekretua, klubaren estatutuak eta aplikagarriak diren gainerako araudiak, eta bere batzar orokorrak eta gainerako gobernu-organismoek hartutako erabaki baliodunak. Lege-xedapen horiek jasotzen ez duten alderdiei dagokienez, elkarteen alorrean indarrean dagoen araudi orokorra aplikatuko da.

3. ARTIKULUA.- Kasuan kasuko kirol-kluba atxikitzen den kirol-federazioaren lege-xedapenak aplikatuko zaizkio Club Deportivo Padurari, afiliazio horren ondorioz bidezkoa den neurrian.

4. ARTIKULUA.- Club Deportivo Padurak nagusiki Euskadiko Autonomia Erkidegoan jardungo du, eta bere helbide soziala Arrigorriagan ezarriko du, honako helbidean: Kristo Zeharkalea z/g P.K. 48480 Arrigorriaga (Kristo Santua futbol zelaia). Helbidea aldatuz gero baina udalerrria ez, administrazio-organismoak berak erabaki dezake aldaketa, Euskal Autonomia Erkidegoko Kirol Erakundearen Erregistroari jakinarazita.

II. KAPITULUA **BAZKIDEAK**

5. ARTIKULUA.- Club Deportivo Padurako bazkide guztiak berdinak dira beren eskubide eta betebeharrei dagokienez. Ez da egongo, beraz, haien jatorria, sexua, arraza, erlijioa, hizkuntza, sexu-joera edota beste edozein egoera edo zirkunstantzia pertsonal edo sozial dela-eta diskriminaziorako biderik emango duen inolako xedapenik.

6. ARTIKULUA.- Club Deportivo Padurako kidea izateko, honako baldintza hauek bete behar dira:

- a) Dagokion sarrera-kuota ordaintzea.
- b) Interesa edukitzea kirol-klubaren helburuetan.

7. ARTIKULUA.- Club Deportivo Paduran sartzeko eskaera idatziz bidali behar zaio presidenteari. Presidenteak jakitun jarriko du Zuzendaritza Batzordea eta aurreko artikuluan adierazitako baldintzak betetzen diren ala ez aztertu ondoren eskaera onestea edo baztertzea erabakiko du. Erabaki horren aurka ez da errekurtsorik onartuko.

8. ARTIKULUA.- Club Deportivo Padurako bazkideek honako eskubide hauek izango dituzte:

- a) Klubaren helburu espezifikoak lortzeko bidean parte hartzea, indarreko legedian eta estatutuetan xedatutakoari jarraituz, eta helburu horiek bete daitezela exijitzea.
- b) Kluba libreki uztea.
- c) Klubaren jarduerak ezagutzea eta beraren dokumentazioa aztertzea.
- d) Klubaren baitan bere iritzia askatasunez adieraztea.
- e) Klubaren ordezkaritza- eta gobernu-organoetarako hautesle eta hautagaiak izatea, betiere adinez nagusiak badira, jarduteko gaitasun osoa badute, eta gutxienez bazkide legez urte bateko antzinasuna badute.
- f) Haien aurka diziiplina-neurriak ezarri baino lehen entzunak izatea, bai eta neurri horiek funtsatu duten gertaeren gaineko informazioa jasotzea ere; gainera, isunik badagokio, horri buruzko erabakia arrazoitua izango da.
- g) Legearen edo estatutuen aurkakotzat jotzen dituzten klubeko organoen erabakiak aurkaratzea

9. ARTIKULUA.- Club Deportivo Padurako bazkideek honako betebeharrak izango dituzte:

- a) Klubaren helburuak partekatzea eta horiek lortzeko bidean kolaboratzea.
- b) Estatutuen arabera bazkide bakoitzak ordaindu behar dituen kuotak, derramak eta bestelako ekarpenak ordaintzea.
- c) Klubeko organoek hartzen dituen baliozko erabakiak ontzat hartzea eta betetzea.
- d) Estatutuetatik eta araudietatik ondorioztatzen diren gainerako betebeharrak.

10. ARTIKULUA.- Bazkide izateari utziko zaio honako kasu hauetan:

- a) Norberaren borondatez.
- b) Heriotzagatik edo, pertsona juridikoen kasuan, desegiteagatik.
- c) Bazkide-kuotak arauz ezarritako epean ez ordaintzeagatik, betiere berandutze horren arrazoiak ez badira behar bezala justifikatzen Zuzendaritza Batzordearen iritziz.
- d) Estatutuetan edo araudietan ezarritako betebeharren ez-betetze larri batengatik isuna jasotzeagatik, edo Batzar Nagusiak edo Zuzendaritza Batzordeak hartutako baliozko erabakien ez-betetze larri batengatik.

11. ARTIKULUA.- Klubeko kideek isuna jaso dezakete, betiere alde zurretik administrazio espedientea izapidetu eta interesatuari entzunaldia eman ondoren. Isunak izan daitezke, hasi aldi baterako eskubideak galtzetik kluba behin betiko uzterainokoak.

III. KAPITULUA **DOKUMENTUEN ARAUBIDEA**

12. ARTIKULUA.- Club Deportivo Padurak honako liburu hauek, gutxienez, edukiko ditu antolatuta eta eguneratuta:

- a) Bazkideen Erregistro Liburua.
- b) Kide anitzeko organoen akta-liburuak.
- c) Kontabilitate-liburuak.
- d) Hala badagokio, zor-tituluen edo ondarezko zati alikuotaren erregistro-liburuak.

Aipaturiko liburu horien kudeaketa-lanak ez du kentzen beste xedapen orokor batzuen ondorioz egin beharreko dokumentuen gaineko betebeharrak egin behar ez direnik.

Liburu horiek Euskal Autonomia Erkidegoko Kirol Erakundearen Erregistroan legeztatuko dira, bertako araudi erregulatuaren arabera.

13. ARTIKULUA.- Bazkideen Erregistro Liburuan haien izen-abizenak eta helbidea jaso beharko dira. Gainera, alta eta baja egunak ere idatzi beharko dira.

14. ARTIKULUA.- Akta-liburuetan Batzar Nagusiak eta Zuzendaritza Batzordeak eginiko bilerak jasoko dira: eguna, parte hartzaileak, aztergaiak eta hartutako erabakiak. Klubaren presidentek eta idazkariak sinatu beharko dituzte aktok.

15. ARTIKULUA.- Kontabilitate-liburuetan kontabilitatearen alorrean indarrean dauden xedapenek eskatzen dituzten datu eta mugimenduak jaso beharko dira; hartara, klubaren ondarearen berri zehatza emango dute, eta haren finantza-egoeraren eta emaitzaren berri zehatza ere, bai eta ondasunen inbentarioarena ere.

IV. KAPITULUA **ORDEZKARITZA, GOBERNU ETA ADMINISTRAZIO ORGANOAK**

16. ARTIKULUA.- Hauek dira Club Deportivo Paduraren organoak:

- a) Batzar Nagusia
- b) Zuzendaritza Batzordea:
- c) Presidentzia

I. ATALA **BATZAR NAGUSIA**

17. ARTIKULUA.- Batzar Nagusia gobernu-organo gorena da, eta boto-eskubidea duten bazkide guztiek osatzen dute. Batzar honetan boto eskubidea izateko honako baldintza hauek bete behar dira: adinez nagusia izatea eta zigor larriarengatik eskubideak etenda ez izatea, beti ere espediente-instrukzioa eta entzunaldia tramitea betez gero.

18. ARTIKULUA.- Hona zeintzuk diren Batzar Nagusiaren gutxienerako zereginak:

- a) Presidentea edo, hala badagokio, Zuzendaritza Batzordea aukeratzea, bakarka, askatasunez, zuzenean eta isilpean egindako bozketaren bidez.
- b) Kontuak eta aurrekontuak onartzea.
- c) Erregelamenduak onartzea.
- d) Estatutuak aldatzea.
- e) Klubaren bat-egitea, zatiketa, eraldaketa edo desegitea onartzea.
- f) Dirua maileguan hartzea.
- g) Higiezinak besterentzea eta zergapetzea.

- h) Eskualda daitezkeen zor-titulu adierazgarriak edo ondarezko zati alikuotarena ematea.
- i) Presidentearen aurkako edo, hala badagokio, Zuzendaritza Batzordearen aurkako zentsura-mozioa onartzea.
- j) Administrazio-organoko kideen ordainsariaren baldintzak onartzea.

19. ARTIKULUA.- Batzar Nagusiak ohiko bilkurak egingo ditu kontuak onartzeko eta, nahitaezkoa izanez gero, aurrekontua onartzeko; bilkura bereziak ere egingo ditu, sortzen diren bere eskumeneko gainerako gaiak aztertzeko.

20. ARTIKULUA.- Club Deportivo Padurako presidenteari dagokio Batzar Nagusiaren ohiko bilkurarako deia egitea. Hori ezinezkoa bada edo presidenteak deialdia epearen barruan egiteko obligazioa betetzen ez badu, Zuzendaritza Batzordeak edo edozein bazkide-taldek egin dezake deialdia, baldin boto-eskubidea duten bazkideen %10era iristen bada.

Klubaren presidenteari edo boto-eskubidea duten bazkideen %10era iristen den edozein bazkide-talderi dagokio Batzar Nagusi Berezirako deialdia egitea.

21. ARTIKULUA.- Batzar Nagusirako deia –dela ohikoa dela berezia–, aztergaien zerrendarekin batera, klubaren iragarki-taulan –edo, halakorik balego, klubeko web gune ofizialean- jarritako iragarki baten bidez jakinaraziko zaie bazkideei. Iragarkia 15 eguneko aurretik jarriko da, gutxienez, salbu eta premiazko epeen kasuetan edo ezustean gertaturiko larrialdien kasuetan. Ez iragarki taularik, ez web gunerik ez balego, jakinarazpena posta arruntaren bidez edo posta elektronikoaren bidez bidaliko da.

22. ARTIKULUA.- Batzar Nagusia –dela ohikoa dela berezia– baliozkotzat joko da baldin eta lehenengo deialdian kideen %50 gutxienez bertaratzen badira. Bigarren deialdian, baliozkotzat joko da edozein dela ere bertaratzen diren kideen kopurua. Bigarren deialdian, bilera ezingo da egin harik eta aurreneko deialditik hogeita hamar minutu pasa arte.

II. ATALA

ZUZENDARITZA BATZORDEA

23. ARTIKULUA.- Zuzendaritza Batzordea Club Deportivo Padurako administrazio-organoa da. Bertako kideen kopurua bakoitia izango da, alegia, 21 kide gehien jota. Honako hauek osatuko dute, gutxienez, Zuzendaritza Batzordea: presidentea, zeina klubaren presidentea bera izango baita, presidenteordea eta idazkaria.

24. ARTIKULUA.- Zuzendaritza Batzordeari kudeaketa administratiboari eta ekonomikoari buruzko eginkizunak esleituko zaizkio, eta horiek betetzeko Batzar Nagusiak emandako jarraibideak errespetatuko ditu. Eginkizun horietako bat edo guztiak klubean sorturiko batzorde exekutibo bati edo kideren bati eskuordetu ahalko dizkio.

25. ARTIKULUA.- Zuzendaritza Batzordearen bilkuretarako deialdia egitea klubaren presidentearen edo, haren ordeiz, presidenteordearen eginkizuna izango da. Deialdia eta aztergaien zerrenda, dagokion dokumentazioarekin batera, kirol-klubaren webgune jarritako iragarki baten bidez jakinaraziko zaie Zuzendaritza Batzordeko kideei. Iragarkia bi egun aurretik jarriko da, gutxienez, salbu eta premiazko epeen kasuetan edo ezustean gertaturiko larrialdien kasuetan. Webgunerik ez badago, jakinarazpena posta arruntaren bidez edo posta elektronikoen bidez bidaliko da.

26. ARTIKULUA.- Batzar Nagusia baliozkotzat joko da baldin eta lehenengo deialdian kideen %50 gutxienez bertaratzen badira, eta bigarren deialdian kide bi gutxienez bertaratzen badira, betiere horietako bat presidentea edo presidenteordea bada.

Halaber joko da baliozkotzat baldin eta, aurretik deialdirik egin gabe ere, Zuzendaritza Batzordeko kide guztiak bertaratzen badira eta aho batez hala erabakitzen badute.

27. ARTIKULUA.- Klubaren presidentea edo, haren ordeiz, presidenteordea izango da Zuzendaritza Batzordeko burua eta Batzordearen jarduna koordinatuko duena.

28. ARTIKULUA.- Idazkariak sarrera-eskaerak jaso eta bideratuko ditu, klubaren bileren aktak egingo ditu, bazkideen fitxategiaz eta erregistro-liburuaz arduratuko da, bai eta klubaren webguneaz eta lan administratiboak zuzentzeaz ere. Langintza horietarako, langile edo kolaboratzaileen laguntza jaso ahal izango du.

29. ARTIKULUA.- Zuzendaritza Batzordeak, edo bertako kideek banaka, honako kasu hauetan utziko dute kargua:

- a) Dimisioa ematen duelako.
- b) Heriotzagatik edo, pertsona juridikoen kasuan, desegiteagatik.
- c) Zentsura-mozioa onartu delako.

Kideen banakako kargu-uzteen ondorioz Zuzendaritza Batzorde osoarena gertatzeko, kideen erdiek gutxienez utzi behar dute beren kargua.

Zuzendaritza Batzordearen kargu-uztea gertatzen bada, Batzorde Kudeatzaile bat eratuko da eta Batzar Nagusi Berezirako deia egingo

da, Zuzendaritza Batzorde berria hautatzeko. Hori ezinezkoa bada, edozein bazkide-taldek egin dezake deialdia, baldin boto-eskubidea duten bazkideen %10era iristen bada.

Zuzendaritza Batzordeko kide batek edo gehiagok banaka kargua uzten badute, baina hala ere kideen %50ek beren karguari eusten badiote, postu hutsak kooptazio bidez bateko dira, alegia, Zuzendaritza Batzordeko kideek askatasunez aukeratuko dituzte kargu berriak beteko dituzten pertsonak. Kooptazio bidez izendatzen diren kideak egiten den lehenengo Batzar Nagusian berretsiko dira.

III. ATALA PRESIDENTEA

30. ARTIKULUA.- Presidentea klubaren organo exekutiboa da; klubaren legezko ordezkariak dauka eta administrazio-organoen burua da, eta organo horiek hartutako baliozko erabakiak exekutatzeko betebeharra dauka.

31. ARTIKULUA.- Presidentea, Zuzendaritza Batzordeko gainerako kideak bezala, zerrenda itxien hautagaitzen bidez aukeratuko da, eta hautagaitzan lehenengo postuan dagoena horixe aukeratuko da presidente.

32. ARTIKULUA.- Presidenteak estatutu hauetako 29. artikuluan adierazitako arazoietako batengatik utzi ahal izango du kargua. Klubeko Presidentearen postua hutsik gelditzen bada, aipaturiko arau horretan aurreikusitako moduan jokatu da.

IV. ATALA XEDAPEN OROKORRAK

33. ARTIKULUA.- Club Deportivo Paduraren Zuzendaritza Batzordea eta presidentea lau urterik behin aukeratuko dira, bakarka, askatasunez, zuzenean eta isilpean egindako bozketaren bidez, eta aukeraketan adinez nagusiak diren eta gutxienez urtebeteko antzintasuna duten bazkide guztiek parte hartu halako dute. Bozketan ez da boto-ordezkaritarik onartuko.

Kirol-klubeko organoetako kideek jardunean jarraituko dute kide berriak karguaz jabetzen diren arte, non eta ez den gertatzen horretarako ezintasun ageriko bat.

Zuzendaritza Batzordeko kideek beren kargua betetzeagatik ordainsariak jaso ahalko dituzte, betiere Batzar Nagusiak berariaz

onartzen badu, beste aztergaietatik aparteko gai moduan, eta bertaratutako kideen bi herenak alde agertzen badira.

34. ARTIKULUA.- Batzar Nagusiak Zuzendaritza Batzordeko kide guztien edo haietako baten edo batzuen erantzukizuna exijitu ahal izango du zentsura-mozio baten bidez. Mozio horrek, aurrera egingo badu, berariaz deitutako bilkuran bertaratutakoen bi herenen aldeko botoa beharko du.

Zentsura-mozioa idatziz aurkeztu beharko zaio Zuzendaritza Batzordeari, bazkide guztien %10eko babesarekin. Batzar Nagusi Bereziak aztergai bakarra izango du: zentsura-mozioa eztabaidatzea eta haren gaineko ebazpena ematea.

Zuzendaritza Batzorde osoaren aurkako mozio-zentsura onartzeak bertako kide guztien kargu-uztea ekarriko du, klubaren presidentearena barne. Zentsura-mozioa batzordekide baten edo batzuen aurkakoa bada, hura onartzeak batzordekide horien kargu-uztea soilik ekarriko du.

Zentsura-mozioak presidente berria izateko hautagai baten proposamena jaso dezake, edota, hala badagokio, Zuzendaritza Batzorde osoarena edo bertako kide batena edo batzuen. Hautatutako kargu berrien agintaldia aurreko agintaldiari bukatzeko falta zaion adinakoa izango da.

35. ARTIKULUA.- Inola ere ez dira bateragarriak izango kirol-klub baten presidente kargua eta klub hori atxikita dagoen kirol-federazioaren presidentea kargua.

Pertsona bera ezingo da izan batera kirol-modalitate bereko eta kategoria bereko kirol-klub baten baino gehiagoren presidentea.

V. KAPITULUA **HAUTESKUNDE PROZESUA**

36. ARTIKULUA.- Klubaren hauteskunde-prozesuak ekainaren 22ko 163/2010 Dekretuan ezarritakoa beteko du, bai eta estatutu hauetan eta Batzar Nagusiak onartzen dituen gainerako hauteskunde-araudietan ezarritakoa ere.

37. ARTIKULUA.- Administrazio-organoetarako aurkeztzen diren hautagaitzetan emakumeen eta gizonen arteko oreka gordeko da, arrazoi objektiboak tarteko ezinezkoa denean izan ezik.

Hautagaitza bakarra baldin badago, zuzenean aukeratuko da, inolako bozketarik egin behar izan gabe.

VI. KAPITULUA **ARAUBIDE EKONOMIKOA**

38. ARTIKULUA.- Kluba berezko aurrekontu eta ondare araudiaren mende egongo da. Ekonomia-ekitaldia urtekoa izango da, eta amaiera urte bakoitzeko ekainaren 30ean izango du.

Klubak ez du fundazio-ondararik, eta bere jarduerak aurrera eramateko honako baliabide hauek erabiliko ditu:

- a) Batzar Nagusiak, hala badagokio, erabakitzen dituen sarrera-kuotak edo/eta aldizkako kuotak.
- b) Berez dagozkion ondasun eta eskubideen produktuak, bai eta jasotzen dituen diru-laguntzak, dohaintzak, utziriko ondarea eta babes-laguntzak ere.
- c) Estatutuetan adierazitako helburuei begira klubak egiten dituen legezko jardueretatik eratorritako beste diru-sarrerak.

Diru-sarrera guztiak, kirol-ekitaldietan eskuratutakoak barne, oso-osorik erabiliko dira helburu soziala garatzeko. Inola ere ez da onartuko etekinak bazkideen artean banatzerik, ezta haien ezkontideen edo antzeko afektibitate-harremana duten bizikideen artean ere, edo ahaideen artean. Orobat, ezingo da doako lagapenik egin irabaziasmoa duten pertsona fisiko edo juridikoen alde.

Ondasun higiezinak erabiltzeko, besterentzeko edo zergapetzeko, Batzar Nagusian bertaratutakoek bi herenen gehiengo adostutako erabakia beharko da.

39. ARTIKULUA.- Kluba deseginez gero, edo bazkideren bat egotziz gero, pertsona horrek eskubidea izango du hasieran ordaindu zuen ondare-partaidetzaren diru-kopurua edo beste diru-ekarpenak erreuperatzeko, salbu eta bazkidetza-kuota moduan ordaindutako kopuruak. Horretarako, baina, ezinbesteko baldintza da ondare-murrizketaren ondorioz hirugarren pertsona edo entitateek kalterik ez jasotzea. Banantze kasuetako ondare-partaidetza berreskuratzeak ez du zertan eraginik izan klubaren irabazi asmorik gabeko izaeran. Batzar Nagusiari dagokio artikulua honetan adierazitako erabakiak abian jartzea.

VII. KAPITULUA **ESTATUTUAK ALDATZEA**

40. ARTIKULUA.- Estatutu hauek aldatzeko edo indargabetzeko, berriaz deitutako Batzar Nagusi Bereziaren erabakia beharko da, alegia, bertaratutako bazkideen bi herenen gehiengo kualifikatuaren adostasunez hartutako erabakia.

VIII. KAPITULUA: **DESEGITEA ETA LIKIDAZIOA**

41. ARTIKULUA.- Kluba Batzar Nagusiaren erabakiz desegingo da, estatutu hauek aldatzeko ezarri diren baldintzak eta gehiengoa errespetatuta, edo ebazpen judizialaren bidez.

42. ARTIKULUA.- Behin kluba deseginez gero, likidazio-epaia hasiko da. Epe hori amaitu arte klubak bere nortasun juridikoari eutsiko dio.

Administrazio-organoko kideak likidatzaile bihurtuko dira, salbu eta Batzar Nagusiak edo, hala badagokio, desegitea ebatzi duen epaileak beste batzuk izendatzen baditu; eta 163/2010 Dekretuaren 69.3 artikuluan xedatutako funtzioak beteko dituzte.

Likidazio-fasean dagoen bitartean, klubak "likidazio-fasean" esaldia erantzi beharko dio bere izenari.

43. ARTIKULUA.- Kluba desegin eta likidatuz gero, haren ondorioz geratzen den ondare garbia udalerrri bereko, edo hala badagokio, lurralde historiko bereko beste kirol-entitate baten bitartez kirola sustatzeko eta praktikatzeko helburuetarako erabiliko da.

IX. KAPITULUA: **DIZIPLINA ARAUBIDEA**

44. ARTIKULUA.- Klubak bazkideen gainean duen diziplina-ahalmena klubaren beraren araudiek eta erabakiek ezarriko dute, eta hartzen dituen erabakien kontra ezingo da errekurtsorik jarri kirol-federazioetan edo Kirol Justiziako Euskal Batzordean. Kirol-klubak diziplinaren alorrean hartzen dituen erabakiak jurisdikzio arruntean aurkaratu ahal izango dira.

Arrigorriagan, 2011ko apirilaren 28an

IDAZKARIA

KLUBAREN ZIGILUA

PRESIDENTEA